

**Incumbensa Maissen concernent la cumpatibilitad da la professiun cun la famiglia / vita privata
en l'administraziun chantunala**

Er per l'administraziun chantunala è la mancanza da persunas spezialisadas ina sfida pli e pli gronda. Sco patruna stat ella numnadamain en concorrenza cun l'economia privata. Uschia crescha l'impurtanza da cundiziuns d'engaschament e da lavur progressivas per la recrutaziun da collavuraturas e collavuratur. En vista a la midada da la structura da vegliadetgna, en vista a la diminuziun dal dumber da naschientschas sco er en vista al fatg che dunnas ed umens da la generaziun giuvna, che han bunas scolaziuns, vulan u ston cumbinar adina pli savens la professiun cun la famiglia, vegn la concorrenza per forzas da lavur numnadamain decidida pli e pli savens sur bunas cundiziuns, cunzunt areguard la cumpatibilitad da la professiun cun la famiglia / vita privata. Ina buna cumpatibilitad da la professiun cun la famiglia / vita privata n'è dentant betg mo in factur central en la concorrenza per forzas spezialisadas, mabain er in factur da success per la qualitat, per l'effizienz e per l'efficacità da la prestaziun d'administraziun sco tala.

Per registrar la situaziun actuala areguard la cumpatibilitad da la professiun cun la famiglia / vita privata en l'administraziun chantunala e per eruir soluziuns da meglieraziun fatgas sin mesira, existan differents instruments etablids. Uschia ha la Pro familia Svizra sviluppà in family score che examinescha quant favuraivlas che las structures dals patruns èn per famiglias e che cumpareglia quai ch'è cun quai che duess esser. Qua tras survegnan las organisaziuns infurmaziuns utilas per augmentar lur attractivitat sco patrunas. Las mesiras pussaivlas en chausa cumpiglian temas sco uras da lavur flexiblas, lavur a temp parzial, organisaziun da lavur adattada, clima da lavur, svilup dal persunal, sustegn tar la tgira d'uffants u lieu da lavur flexibel.

In instrument sumegliant porscha il center UND sut il predicat «Familie UND Beruf». En il Grischun accumpogna il center UND – en collavuraziun cun il post da stab chantunal per l'egualità da las schanzas – il program d'acziun per interpresas pitschnas e mesaunas (IPM) grischunas «Structuras favuraivlas per famiglias sco factur da success». A quest program, ch'exista dapi l'onn 2010, èn sa participadas gia duas dunsainas interpresas. Er l'administraziun chantunala duess sa fatschentar cun quest tema impurtant.

Las sutsegnadras ed ils sutsegnaders incumbenseschan perquai la regenza d'examinar – cun agid d'instrument d'analisa etablì – las cundiziuns d'engaschament e da lavur actualas areguard la cumpatibilitad da la professiun cun la famiglia / vita privata en l'administraziun chantunala sco er da realisar las recumandaziuns resultantas per augmentar l'attractivitat e per obtegnair in sigil da qualitat. En il process ston vegnir integrads er las collavuraturas ed ils collavuratur, per che las mesiras vegnian concepidas en moda efficazia e conform als basegns.

Cuira, ils 29 d'avust 2019

Maissen, Hardegger, Schwärzel, Atanes, Baselgia-Brunner, Berther, Brunold, Cahenzli-Philipp, Caluori, Cantieni, Casutt-Derungs, Cavegn, Caviezel (Cuira), Degiacomi, Deplazes (Cuira), Deplazes (Rabius), Derungs, Epp, Fasani, Florin-Caluori, Föhn, Geisseler, Hitz-Rusch, Hofmann, Holzinger-Loretz, Horrer, Kohler, Kunfermann, Locher Benguerel, Loepfe, Märchy-Caduff, Müller (Favugn), Noi-Togni, Paterlini, Perl, Preisig, Rettich, Ruckstuhl, Rutishauser, Sax, Schmid, Schneider, Stiffler, Thomann-Frank, Thöny, Tomaschett-Berther (Trun), Ulber, Wilhelm, Zanetti (Landquart), Engler (Surava)